

努力去做！

獨獨人 m̄ 知將來會 án 怎；伊身後所會發生 ê tai-chì，啥人會 kā 伊講？（《全民台語聖經》傳道師 10：14）

當咱表明相信基督 ê 時，咱宣告基督是咱 ê 主 kah 指導者。咱應允 beh 事奉耶穌，而且咱大部分 ê 人真正是 chit-ê 意思。總是，咱 tiān-tiān 躊躇，咱 teh 等待一個 khah 好 ê 時間，一個完美 ê 時機來事奉祂。

咱講：「Ah，我 chit-má 必須小 khóa á 照顧我家己；我需要累積我 ê 銀行戶頭，免得為後個月煩惱；等阮 hō gín-á 大學畢業，koh 等阮 ê seng-lí 穩定，而且等阮付清厝 ê 貸款以後，然後阮 tòh ē-tàng 真正事奉耶穌。有一工，當阮變成守空 siū ê 人，á 是退休，á 是承接一個期待 ê 繼承，然後阮 tòh 會有時間來維持對基督 ê 應允。Hit 時，阮會變成真正好 ê 基督徒。M̄-koh，阮必須 kā chiah-ê 其它 ê tai-chì 先處理掉。」

Tú-tú 倒 péng ê 是，傳道書 ê 作者 kā 咱講：「M̄-thang 等到 tak 項 tai-chì lóng 完美 chiah beh 來行動，tiòh 勇敢。甚至 tī 完美 ê 時刻來到以前，做你去做一 koá 啥物 tai-chì；你 bē-tàng 一直等到 tak 項 lóng 完全好勢，你必須把握機會。」

所以，努力去做；設定大目標；把握機會。努力去爭取一 koá 奇妙、有挑戰性 kah 冒險性 ê tai-chì，即使失敗，mā 比驚驚無做啥物，koh 講：「我無 beh 努力去做，因為我有可能 bē 成功，我 bē-tàng 冒失敗 ê 危險。」khah 好。

所以，做你去做。伸展你 ê 生活，伸展你 ê 心，koh 伸展你 ê 心智。把握機會；tiòh 勇敢；tiòh 有冒險精神。盡力起造你 ê 生活，即使 tī 生活中有無確定性 kah 無法度知影 ê 事實。大膽用你家己 ê 方法來事奉基督，免驚惶。Óa 靠上帝 ê 應允，然後努力去做。

祈禱：上帝 ah，求祢 hō 我今 á 日有一個好 ê 開始，我知，當我全心全意跟 tòe 祢 kah 祢 ê 教導 ê 時，我 tòh ē-tàng 享受比任何其它方式 koh khah 自由，koh khah 滿足、喜樂 koh 完全 ê 生活。求祢赦免我 ê 愚戇、無膽 kah 欠缺對祢以及對我家己無信心 ê 罪，koh 求祢通過聖神 kā 我 kah 我 ê 救主—耶穌基督結聯做伙。我奉耶穌 ê 名祈禱。阿們。

(1994.10.03)